

**Siap sedia hadapi p'raya umum, kata Hisham  
Malaysiakini.com  
July 04, 2010**

Naib Presiden Umno, Datuk Seri Hishammuddin Tun Hussein berkata hari ini masa telah tiba bagi BN, khususnya Umno, membuktikan bahawa kelemahan dan kesilapan mereka yang wujud sebelum ini telah berjaya diatasi.

Oleh itu, BN dan semua parti komponennya kini perlu bersiap sedia menghadapi Pilihan Raya Umum (PRU) ke-13 tanpa dolak-dalik lagi, kata beliau.

Menurut beliau, alasan-alasan klise dan remeh yang sering digunapakai sebelum ini tidak boleh lagi digunakan sebagai faktor penyokong untuk 'lari' dari bertanding dalam pilihan raya.

Katanya, pindaan terhadap perlembagaan (parti) dan transformasi menyeluruh di dalam Umno adalah langkah drastik yang diambil untuk kembali memperkasakan parti, sekaligus membolehkan Umno muncul sebagai parti komponen BN pertama yang berani bertindak sedemikian rupa.

"Kita tidak ada pilihan. Kita kena siap sedia, sampai bila kita nak beri alasan kita tak bersedia? Sampai bila kita nak katakan bahawa kita belum mampu berdepan dengan pilihan raya umum?"

Sampai bila kita nak katakan bahawa kita masih lagi dibelenggu dengan masalah-masalah yang terpaksa kita hadapi masa pemulihan dulu?

"Tak boleh lagi dah. Masa dah sampai untuk kita bangkit, masa dah sampai untuk kita tunjukkan pada orang ramai bahawa Umno dah insaf, sedar, dah muhasabah diri, dah buat perancangan dan akan lakukan transformasi," katanya pada sidang akhbar selepas merasmikan Mesyuarat Umno Bahagian Serdang.

Menteri Dalam Negeri itu menyatakan demikian ketika merujuk kepada kenyataan seorang lagi Naib Presiden Umno, Datuk Seri Ahmad Zahid Hamidi yang akan mengusulkan supaya Badan Perhubungan Umno Negeri di lima buah negeri kembali diterajui oleh kepimpinan parti negeri terbabit.

Ini kerana, menurut Ahmad Zahid, keadaan Umno di negeri-negeri berkenaan iaitu Selangor, Terengganu, Pulau Pinang, Kedah, dan Wilayah Persekutuan telah kembali mantap dan pulih.

"Memang kepimpinan di semua peringkat negeri mesti diteliti dengan sebaik mungkin kerana yang kita nak pastikan ialah kemenangan calon kita dan parti di setiap negeri," katanya.

Copyright © 1999-2007 Mkini Dotcom Sdn. Bhd.  
Source : <http://www.malaysiakini.com/news/136387>